



閩詞鈔卷二目錄

蔡伸 百四十三首

李持正 一首

鄧肅 三首

劉子翬 二首

高登 三首

康與之 四十首

張元幹 百五十一首

凡七家共詞三百四十三首



閩詞鈔卷二

閩中葉申薌編輯

蔡

伸仙遊人字仲道襄孫政和五年進士歷倅徐楚饒真四州自號友古居士有友古詞

水調歌頭別彭城

醉擊玉壺缺恨寫綠琴哀悠悠往事誰問離思渺難裁
綠野堂前桃李燕子樓中歌吹那忍首重回惟有舊時
月遠遠逐人來 小庭空清夜永獨徘徊伴人幽怨一
枝瀟灑隴頭梅心斷雲帆西去目送煙波東注千里接
長淮為我將雙淚好過楚王臺

又時居莆田

周詩金
亭臯木葉下原隰菊花黃憑高滿眼秋意時節近重陽
追想彭門往歲千騎雲屯平野高宴古毬場弔古論興
廢看劍引杯長感流年思往事重淒涼當時坐間英
俊強半已凋亾慨念平生豪放自笑如今霜髯漂泊水
雲鄉已無功名志此意付清觴

又

相逢非草草一別太匆匆征裘淚痕浥遍眸子怯酸風
天際雲帆難駐柳外香輶望斷雲雨各西東回首重城
遠樓觀暮煙中黯銷魂思陳事已成空東郊勝賞歸
路騎馬踏殘紅月下一尊芳酒凭檻清歌幾曲別後少

人同爲問桃花臉一笑爲誰容

滿庭芳

煙鎖長隄雲橫孤嶼斷橋流水溶溶凭闌凝望遠日送
征鴻桃葉溪邊舊事如春夢回首無蹤難忘處紫薇花
下清夜一尊同東城攜手地尋芳選勝賞遍珍叢念
紫簫聲闕燕子樓空好是盧郎未老佳期在端有相逢
重重恨聊憑紅葉和淚寄西風

又

風捲龍沙雲垂平野晚來密雪交飛坐看闌檻瓊蕊遍
寒枝妝點蘭房景致金鋪掩簾幙低垂紅爐畔淺斟低

唱天色正相宜 更闌人半醉香肌玉暖寶髻雲欹又
何須高會梁苑瑤池堪笑子猷訪戴清興盡忍凍空回
仍休羨漁人江上披得一簑歸

又

鸚鵡洲邊芙蓉城下迥然水秀山明小舟雙槳特地訪
雲英驚破蘭窗好夢開朱戶一笑相迎良宵永南窗皓
月依舊照娉婷 別來無限恨持杯欲語恍若魂驚愴
霎時相見又慘離情還是匆匆去也重攜手密語丁寧
佳期在寶釵鸞鏡端不負平生

又

秦洞花迷巫陽夢斷夜來曾到藍橋洞房深處重許見
雲翹蕙帳殘燈耿耿紗窗外疎雨蕭蕭雙心字重衾小
枕玉困不勝嬌 尋常愁夜永今宵更漏彈指明朝敘
深情幽怨淚浥香綃記取于飛厚約丹山畔別選安巢
驂鸞去青霄路穩明月共吹簫

又

玉鼎翻香紅爐疊勝綺窗疎雨蕭蕭故人相過情話欵
良宵酒暈微紅襯臉橫波浸滿眼春嬌雲屏掩鴛鴦被
暖欹枕聽寒潮 如今成別恨臨風對月總是無聊念
傷心南陌執手河橋還似一場春夢離魂遠楚些難招

佳期在踏青時節花底聽鳴鏹

蘇武慢

雁落平沙烟籠寒水古壘鳴笳聲斷青山隱隱敗葉蕭
蕭天際暝鷗零亂樓上黃昏片帆千里歸程年華將晚
望碧雲空暮佳人何處夢魂俱遠憶舊游邃館朱扉
小園香逕尚想桃花人面書盈錦軸恨滿金徽難寫寸
心幽怨兩地離愁一尊芳酒淒涼危闌倚遍儘遲留憑
仗西風吹乾淚眼

飛雪滿羣山

冰結金壺寒生羅幙夜闌霜月侵門翠筠敲韻疎梅弄

影數聲雁過南雲酒醒欹案枕愴猶有殘妝淚痕繡衾
孤擁餘香未減猶是那時熏長記得扁舟尋舊約聽
小窗風雨燈火昏昏錦茵才展瓊籤報曙寶釵又是輕
分黯然攜手處倚朱箔愁凝黛鬢夢回雲散山遙水遠
空斷魂

水龍吟

重過舊隱

畫橋流水桃溪路別是壺中佳致南樓夜月東窗疎雨
金荷共醉人靜回廊並肩攜手玉芝香裏念紫簫聲斷
巫陽夢覺人何在花空委寂寞危闌獨倚望仙鄉水
雲無際芸房花院重來空鎖蒼苔滿地物是人非小池

唐詩金
依舊彩鴛雙戲念當時風月如今懷抱有盈盈淚

驀山溪
登歷陽城樓

孤城暮角落日邊聲靜醉袖拂危闌對天末孤雲愁凝
吳津楚望表裏抱江山山隱隱水迢迢滿目江南景
羈懷易感往事傷重省羅袂裊餘香鬢星星忍窺青鏡
瓊英好在應念玉關遙凝淚眼下層樓回首平林暝

又

疎梅雪裏已報東君信冷豔與清香似一箇人人標韻
晚來特地酌酒慰幽芳攜素手摘纖枝插向烏雲鬢
老來世事百種皆消盡榮利等浮雲漫汲汲徒勞方寸

花前眼底幸有賞心人歌金縷醉瑤卮此外君休問

又

書雲令旦雪霽嚴凝候玉輦想回鑿正花覆千官錦繡
周南留滯清夢遶觚稜心耿耿路迢迢此際空回首
華堂薦壽玉筍持椒酒一曲囀春鶯更祝我膺時納祐
功名富貴老去已灰心惟只願捧觴人歲歲長依舊

又

金風玉露時節清秋候散髮步閑亭對熒熒一天星斗
悲歌慷慨念遠復傷時心耿耿髮星星倚杖空搔首
區區戀豆豈是甘牛後時命未來間且只得低眉袖手

男兒此志肯向死前休無限事幾多愁總付杯中酒

念奴嬌

凌空寶觀乍登臨多少傷離情味森森烟波吳會遠極
目江淮無際檻外長江樓中紅袖淡蕩秋光裏一聲橫
吹半灘鷗鷺驚起因念邃館香閨玉肌花貌有盈盈
仙子弄水題紅傳密意寶墨銀鈎曾寄淚粉香銷碧雲
路杳脈脈人千里一彎新月腸斷危闌獨倚

又

歲華晚晚念羈懷多感佳會難卜草草杯盤聊話舊同
剪西窗寒燭翠袖籠香雙蛾斂恨低按新翻曲無情風

雨斷腸更漏催促匆匆歸騎難留鸞屏鴛被忍良宵
孤宿回首幽歡成夢境惟覺衣襟芬馥海約山盟雲情
雨意何日教心足不如不見爲君一味愁蹙

又

當年豪放況朋儕俱是一時英傑逸氣凌雲佳麗地獨
占春花秋月冶葉倡條尋芳選勝是處曾攀折昔游如
夢鏡中空歎華髮邂逅萍水相逢十年往事忍尊前
重說茂綠成陰春又晚誰解丁香千結寶瑟彈愁玉壺
敲怨觸目堪愁絕酒闌人靜爲君腸斷時節

又

輕雷驟雨洗千巖濃翠層巒森列衣袂涼生聳竹外時
有飛螢明滅雲浪鱗鱗蘭舟泛泛共載一輪月五湖當
日未應此段奇絕 歸路橫玉驚鸞叫雲清似水悠颺
天末玉宇瓊林凝望處依約廣寒宮闕老去情鍾此心
仍在未肯甘華髮清歡留作異時佳話重說

雨中花慢

寓目傷懷逢歡感舊年來事事疎慵歎身心業重賦得
情濃況是離多會少難忘雨跡雲蹤望斷無錦字雙鱗
杳杳新雁嗶嗶 良宵孤枕人遠天涯除非夢裏相逢
相逢處愁紅斂黛還又匆匆回首綠窗朱戶可憐明月

清風斷腸風月關河有盡此恨無窮

喜遷鶯

青娥呈瑞正慘慘暮寒同雲千里剪水飛花漸漸瑤英
密灑翠筠聲細邃館靜深金鋪半掩重簾垂地明窗外
伴疎梅瀟灑玉肌香膩 幽人當此際醒魂照影永漏
愁無寐強拊清尊慵添寶鴨誰會黯然情味幸有賞心
人奈咫尺重門深閉今夜裏忍教孤負濃香翠被

憶瑤姬

南徐連滄觀賞月

微雨初晴洗瑤空萬里月挂冰輪廣寒宮闕迴望素娥
縹緲仙桂亭亭金盤露冷玉樹風輕頓覺秋思清念去

年曾共吹簫侶同賞蓬瀛 奈此夜旅泊江城湯花光
炫目綠酒如澗幽懷終有恨恨綺窗清影虛照娉婷藍
橋路杳楚館雲深擬憑歸夢尋強就枕無奈孤衾夢易
驚

采桑子慢

明眸秀色別是天真瀟灑更髣髴堆雲玉臉淡拂輕霞
醉裏精神衆中標格誰能畫當時攜手花籠淡月重門
深亞 巫峽夢回已成陳事豈堪重話漫贏得羅襟清
淚鬢邊霜華懷念傷嗟凭闌烟水渺無涯秦源目斷碧
雲暮合難認仙家

滿江紅

人倚金鋪鬢翠黛盈盈墜曉話別處留連無計語嬌聲
咽十幅雲帆風力滿一川烟暝波光闊但回首極目望
高城彈清血 並蘭棹停畫楫曾共醉津亭月銷魂處
今夜月圓人缺楚岫雲歸空悵望漢皋佩解成輕別最
苦是抑塞滿懷愁無人說

波羅門引

再游仙漳薛氏園亭

素秋向晚歲華分付木芙蓉蕭蕭紅蓼西風記得當時
擷翠攜手遶芳叢念吹簫人去明月樓空 遙山萬重
望寸碧想眉峰翠鈿瓊瑤漫好誰適爲容淒涼懷抱算

此際惟我與君同凝清淚目送征鴻

青玉案

參差弱柳長隄路弱柳外征帆去皓齒明眸嬌態度回
頭一夢斷腸千里不到相逢處 來時約畧春將暮幽
恨空餘錦中句小院重門深幾許桃花依舊出牆臨水
亂落如紅雨

又

鸞鳳本是和鳴友奈無計長相守雲雨匆匆分袂後絲
舟東去艣聲啞軋目斷長隄柳 涓涓清淚輕綃透殘
粉餘香尚依舊獨上南樓空回首夜來明月怎知今夜

少箇人攜手

浣溪紗 壬寅五月西湖

雙佩雷文拂手香青紗衫子淡梳妝冰姿綽約自生涼
虛掉玉釵驚翡翠緩移蘭棹趁鴛鴦鬢鬟風亂綠雲
長

又

玉趾彎彎一折弓秋波剪碧艷雙瞳淺顰輕笑意無窮
夜靜擁爐熏鵲腦月明飛棹采芙蓉別來歡事少人
同

又 仙漳二首

蘋末風輕入夜涼飛橋畫閣跨方塘月移花影上回廊
粲枕隨釵雲髻亂紅綿撲粉玉肌香起來攜手看鴛
鴦

又

窗外疎篁對節金畫橋新綠一篙深沈沈清夜對橫參
酒暈半消紅玉臉雲鬟輕製小犀簪夢回陳迹杳難
尋

又 崑山月華閣

沙上寒鷗接翼飛潮生潮落水東西征船鳴榔趁潮歸
望斷碧雲無錦字漫題紅葉有新詩黃昏微雨倚闌

時

又

漠漠新田綠未齊柳陰陰下水平堤竹間時有乳鴉啼
雲斂屏山橫枕畔夜闌璧月轉林西玉芝香裏彩鴛

栖

又

紫燕雙雙掠水飛廉纖小雨未成泥籬邊開盡野薔薇
會少離多終有恨暫來還去益堪悲後期重約采蓮

時

又

固言金
窄窄霜綃穩稱身強臨歌酒慘離魂故人相遇益傷神
斷雨殘雲千里隔瓊枝璧月四時新爲君留取鏡中

春

又

且鬪尊前現在身昔游如夢可銷魂玉容依約舊精神
千里重來人事改一盃相屬意還新韶華不減洞中

春

又向薊林木犀二首

木似文犀感月華寸根移種自仙家春蘭秋菊浪矜誇
玉露初零秋夜永幽香直入小窗紗此時風月獨輸

他

又

葉剪玻璃蕊糝金清香端不數瓊沈獨將高韻冠薊林
千里江山新夢後一天風露小庭深主人歸興已駸

駸

又

淺褐衫兒壽帶藤碾花如意枕冠輕鳳鞵弓小稱娉婷
約畧梳妝隨事好出塵標韻出塵清一被梅映玉壺

冰

虞美人

瑤琴一弄清商怨樓外桐陰轉月華澄淡露華濃寂寞
小池烟水冷芙蓉 攀花擷翠當時事綠葉同心字有
情還解憶人無過盡寒沙新雁甚無書

又

飛梁石逕關山路慘淡秋容暮一行新雁破寒空腸斷
碧雲千里水溶溶 鸞衾欲展誰堪共簾幙霜華重鴨
爐香盡錦屏中幽夢今宵何許與君同

又

紅塵匹馬長安道人與花俱老緩垂鞭袖過平康散盡
高陽零落少年場 朱絃重理相思調無奈知音少十

年如夢儘堪傷樂事如今回首做淒涼

又

甲辰入燕

綵旗搖曳檣烏轉鷁首征帆展高城樓觀暮雲平疊鼓
凝笳都是斷腸聲 綠窗朱戶空回首明月還依舊亂
山無數水茫茫誰念塞垣風物煞悽惶

又

堆瓊滴露冰壺瑩樓外天如鏡水晶雙枕襯雲鬟臥看
千山明月聽潺湲 渡江桃葉分飛後馬上猶回首郵
亭今夜月空圓不似當時攜手對嬋娟

又

碧溪曾寄流紅字忍話當時事重來種種盡堪悲有酒
盈盃聊爲故人持 夜闌剪燭西窗語懷抱今如許尊
前莫訝兩依依綠髻朱絃不似少年時

又

鸞屏繡被香雲擁平帖幽閨夢覺來重試古龍涎深炷
玉爐燒氣不燒烟 匆匆人去三更也月到回廊下出
門無語送郎時淚共一天風露溼羅衣

生查子

畫堂初見伊明月當窗滿今夜月如眉話別河橋畔
重見約中秋莫負于飛願免使月圓時兩處傷腸斷

又

霜寒月滿窗夜永人無寐絳蠟有餘情偏照鴛鴦被
看盡舊時書滴盡今生淚街鼓已三更還是和衣睡

又

金壺插玉芝人面交相照花影滿方牀翠疊屏風杳
風月亦多情特地今宵好儘道夜初長彈指東窗曉

又

幾番花信風數點籠絲雨並轡踏香塵選勝東郊路
韶華轉首空誰解留春住幸到綠尊前且作鶯花主

又

銀釭委墮紅碧瑣朦朧曉別淚灑金徽一曲情多少
郵亭今夜長明月香幃悄縱使夢相逢何處尋蓬島

南歌子

蕭寺疎鐘斷虛堂夜氣清涼蟾偏向水邊明露井碧梧
寒葉顫秋聲幽恨人誰問孤衾淚獨橫此時風月此
時情擬倩藍橋歸夢見雲英

又

遠水澄明綠孤雲黯淡愁白蘋紅蓼滿汀洲腸斷圓蟾
空照木蘭舟節物傷羈旅歸程歎滯留佳期已誤小
紅樓賴得今年猶有閨中秋

又

恨入眉峰翠寒生酒暈紅臨岐凝淚灑西風須信世間
無物似情濃玉鐙敲霜月金鉦伴曉鐘淒涼古驛亂
山重今夜擁衾無夢與君同

南鄉子

天外雨初收風緊雲輕已變秋邂逅故人同一笑遲留
聚散人生宜自謀去路指南州萬頃雲濤一葉舟莫
話太湖波浪險歸休人在溪邊正倚樓

又

答向伯恭向詞云憑書續斷腸

木落雁南翔錦鯉殷勤爲渡江淚墨銀鉤相憶字成行

滴損雲牋小鳳皇 陳事費思量回首烟波捲夕陽儘
道憑書聊破恨難忘直至書來更斷腸

菩薩蠻

鴛鴦枕上雲堆綠蘭膏微潤知新沐開帳對華燈見郎
雙眼明 錦衾香馥郁檻竹敲寒玉何物最無情曉雞
啣喔聲

又

杏花零落清明雨捲簾雙燕來還去枕上玉芙蓉暖香
堆錦紅 翠翹金鈿雀蟬髻慵梳掠心事一春閑黛眉
顰遠山

又

飛英不向枝頭住等閑又送春歸去雲幄翠陰浮長隨
日腳流 玉簫吹鳳怨驚起樓中燕飛去自雙雙惱人
空斷腸

又

水光山色浮空碧柳絲搖曳春無力柳岸繫行舟吹簫
憶舊游 舊游堪更憶望斷迷南北千古恨悠悠長江
空自流

又

當時攜手今千里可堪重到相逢地觸目盡關心流鶯

尚好音 無人知我意只有涓涓淚寂寞對斜陽羅衣
衰舊香

又

鳴笳疊鼓催雙槳扁舟穩泛桃花浪別淚洒東風前歡
如夢中 夢魂無定據不到相逢處縱使夢相逢香閨
豈解同

又

金鋪半掩銀蟾滿箇人應恨歸來晚軋軋鶻聲遲那知
心已飛 迎門一笑粲嬌困橫波慢慢偎倚綠窗前今宵
八月圓

又

雙雙紫燕來華屋雨餘芳草池塘綠一夜擺花風鶯花
滿樹紅 盃深君莫訴醉袖歌金縷無奈惜花心老來
情轉深

又

朝來一陳狂風雨春光已作堂堂去茂綠滿繁枝青梅
結子時 攀枝驚晚晚樂事孤心眼正是惜春歸那堪
怨別離

又

凝羞隔水拋紅豆嫩桃如臉腰如柳心事暗相期陽臺

雲雨迷 玉樓花似雪花上朦朧月揮淚執柔荑匆匆
話別時

又

花冠鼓翼東方動蘭閨驚破遼陽夢翠被小屏山曉窗
燈影殘 並頭雙燕語似訴橫塘雨風雨曉寒多征人
可奈何

憶秦娥 西湖

湖光碧春花秋月無今昔無今昔十年往事盡成陳迹
玉簫聲斷雲屏隔山遙水遠長相憶長相憶一生懷
抱為君牽役

又

花陰月蘭堂夜宴神仙客神仙客江梅標韻海棠顏色
良辰佳會誠難得花前一醉君休惜君休惜楚臺雲
雨今夕何夕

清平樂

彩舟雙艣六月臨平路小雨輕風消晚暑繞岸荷花無
數 玉人棗枕方牀遙知待月西廂昨夜有情風月今
宵特地淒涼

又

南窗月滿繡被堆香暖若恨春宵更漏短應訝郎歸又

晚 征帆初落橋邊迎門一笑嫣然今夜流霞共酌何妨金盞垂蓮

又

明眸秀色肌理凝香雪羅綺叢中標韻別捧酒歌聲清越不辭醉臉潮紅卻愁歸騎匆匆回首綠窗朱戶斷腸明月清風

謁金門

溪聲咽溪上有人離別別語丁寧和淚說羅巾沾淚血儘做剛腸如鐵到此也應愁絕回首斷山帆影滅畫船空載月

又

相思切觸目只供愁絕好夢驚回清漏咽燭殘香穗結長恨南樓明月只管照人離缺同倚朱闌飛大白今宵風月別

憶王孫

涼生冰簟怯衣單明月樓高空畫闌滿院啼螿人未眠掩重關烏鵲南飛風露寒

阮郎歸

烟籠寒水暝禽棲滿庭紅葉飛蘭堂寂寂畫簾垂霜濃更漏遲鴛被冷麝香微強欹單枕時西窗看盡月痕

移此情君怎知

柳梢青

數聲鷓鴣可憐又是春歸時節滿院東風海棠鋪繡梨花飄雪丁香露泣殘枝算未比愁腸寸結自是休文多情多感不干風月

又

子規啼月幽衾夢斷銷魂時節枕上斑斑枝頭點點都成清血淒涼斷雨殘雲算此恨文君更切老去情懷春來況味那禁離別

又

聯璧尋春踏青尚憶年時攜手此際重來可憐還是年年時候陰陰柳下人人面似桃花依舊但願年年春風有信人心長久

好事近

花露滴香紅花底漏聲初歇人似一枝梅瘦照冰壺清徹翠蛾雲髻爲誰容蟲絲寶奩結可惜一春憔悴負滿懷風月

又

十幅健帆風天意巧催行客極目五湖雲浪沈滿空秋色玉人應怪誤佳期凝恨正脈脈錦鱗爲傳尺素報

蘭舟消息

卜算子

風雨送春歸寂寞花空委枝上紅稀地上多萬點隨流水
翠黛斂春愁照影臨清泚應念韶華惜蕚顏酒遍
燕支淚

又

小閣枕清流一霎蓮塘雨風遞幽香入檻來枕簟全無
暑遐想似花人閱歲音塵阻物是人非空斷腸夢入
芳洲路

又題扇

玉斧斲冰輪中有乘鸞女髻亂釵橫襟袖涼只恐輕飛
舉青冥縹緲間自有吹簫侶不向巫陽十二峰朝暮
為雲雨

又

前度月圓時月下曾攜手今夜天邊月又圓夜色如清
晝風月渾依舊水館空回首明夜歸來試問伊曾解
思量否

又

重重雪外山渺渺烟中路路轉山橫無盡愁正是分攜
處望極錦中書腸斷魚中素錦素沈沈雨未期魚雁

空相誤

小重山

吳松浮天閣送別

樓外江山展翠屏沈沈虹影畔彩舟橫一尊別酒爲君
傾留不住風色太無情斜日半山明畫闌重倚處獨
銷凝片帆回首在青冥人不見千里暮雲平

踏莎行

客裏光陰傷離情味玉觴未舉心先醉臨歧莫怪苦留
連橋烏轉處人千里恨寫新聲雲牋密寄短封難盡
心中事憑君看取紙痕斑分明總是離人淚

又

水滿青錢烟滋翠葆殘英滿地無人掃先來羈思亂如
雲無端更被春醒惱疊疊遙山綿綿遠道凭闌滿目
惟芳草莫驚青鬢點秋霜盧郎已分愁中老

定風波

一曲驪歌酒一鍾可憐分袂太匆匆百計留君君不住
君去滿川烟暝滿帆風目斷魂銷人不見但見青山
隱隱水浮空擬把一襟相憶淚試對雲牋密洒付征鴻

點絳脣

登歷陽連雲觀

水遶孤城亂山深鎖橫江路帆歸別浦冉冉蘭皋暮
人在天涯雁背南雲去空凝竚鳳樓何處烟霧迷津渡

又

香雪飄零暖風著柳籠絲雨惱人情緒春事還如許
寶勒朱輪共結尋芳侶東郊路亂紅深處醉拍黃金縷

又

背壁燈殘臥聽簷雨難成寐井梧飄墜歷歷蛩聲細
數盡更籌滴盡羅巾淚如何睡甫能得睡夢到相思地

又

月缺花殘世間樂事難雙美夜來相對把酒彈清淚
一點情鍾銷盡英雄氣樊籠外五湖烟水好作扁舟計

又

人面桃花去年今日津亭見瑤琴錦薦一弄清商怨
今日重來不見如花面空腸斷亂紅千片流水天涯遠

又

梅雨初晴畫闌開遍忘憂草蘭堂清窈高柳新蟬噪
枕上芙蓉如夢還驚覺勻妝了背人微笑風入玲瓏罩

又

帳外華燈翠屏花影參差滿錦衣香暖苦恨春宵短
畫角聲中雲雨還驚散河橋畔月華如練回首成腸斷

又

綠萼冰花數枝清影橫疎牖玉肌消瘦夜久輕寒透

忍使孤芳扳折他人手人歸後斷腸回首只有香盈袖
又

雲雨匆匆洞房當日曾相遇暫來還去無計留春住
寶瑟重調靜聽鸞絲語休輕負綺窗朱戶好做風光主
昭君怨
一曲雲和鬆響多少離愁心上寂寞掩屏帷淚沾衣
最是銷魂處夜夜綺窗風雨風雨伴愁眠夜如年

醉落魄

波紋如縠池塘雨後添新綠海棠初綻紅生肉雙燕歸
來還認舊巢宿凝情憑暖闌干曲新愁無限傷心目

誰人月下吹橫玉驚起鴛鴦飛去自相逐

極相思

相思情味堪傷誰與話衷腸明朝見也桃花人面碧蘚
回廊別後相逢惟有夢夢回時展轉思量不如早睡
今宵魂夢先到伊行

玉樓春

碧桃溪上藍橋路寂寞朱門閑院宇粉牆疎竹弄清蟾
玉砌紅蕉宜夜雨箇中人是吹簫侶花底深盟曾共
許人生樂在兩知心此意此生君記取

又

星河風露經年別月照離亭花似雪寶釵鸞鏡會重逢
花裏同眠今夜月 月華依舊年時節細把離腸和淚
說人生只合鎮長圓休似月圓圓又缺

長相思

我心堅你心堅各自心堅石也穿誰言相見難 小窗
前月嬋娟玉困花柔並枕眠今宵人月圓

又

錦衾香玉枕雙昨夜深深小洞房回頭已斷腸 背蘭
缸夢仙鄉風撼梧桐雨灑窗今宵好夜長

又

邨姑兒紅袖衣初發黃梅插稻時雙雙女伴隨 長歌
詩短歌詩歌裏真情恨別離休言伊不知

西地錦

寂寞悲秋懷抱掩重門悄悄清風皓月朱闌畫閣雙鴛
池沼 不忍今宵重到惹離愁多少蓬山路杳藍橋信
阻黃花空老

歸田樂

風生蘋末蓮香細新浴晚涼天氣獨自倚朱闌波面雙
雙彩鴛戲 鸞釵委墮雲堆髻誰會此時情意冰簟玉
琴橫還是月明人千里

七娘子

天涯觸目傷離緒登臨況值秋光暮手撚黃花憑誰分
付噫噫雁落蒹葭浦憑高目斷桃溪路屏山樓外青
無數綠水紅橋瑣窗朱戶如今總是銷魂處

感皇恩

酒暈襯橫波玉肌香透輕裊腰肢妒垂柳臂寬金駟且
是不干春瘦撚金雙合字無心繡鬢雲半墮金釵欲
溜羅袂殘香忍重嗅渡江桃葉腸斷爲誰招手倚闌凝
望久眉空鬪

又

膏雨曉來晴海棠紅透碧草池塘裊金柳王孫何在
不念玉容消瘦日長深院靜簾垂繡粲枕墮釵粉痕輕
溜玉鼎龍涎記同嗅鈿箏重理心事漫憑纖手素絃彈
不盡眉峰鬪

添字漁家傲

烟鎖池塘秋欲暮細細荷香直到雙棲處並枕東窗聽
夜雨偎金縷雲深不見來時路曉色朦朧人去住香
覆重簾密密聞私語目斷征帆歸別浦空凝竚苔痕綠
印金蓮步

相見歡

紅靴玉帶歲粧翠綃衣並轡垂鞭妝影照清溪
長亭
路停騎處晚涼時空有許多明月伴雙棲

洛陽春

好在章臺楊柳不禁春瘦淡烟微雨麴塵絲鎖一點眉
頭皺
憶自章臺別後青青依舊萬絲千縷太多情忍
扳折行人手

臨江仙

繁杏枝頭蜂蝶亂香風闔座微聞靚妝濃豔任東君無
情風雨春事已平分
珍重主人留客意夜闌秉燭開
尊何須歌韻遏行雲羽觴交勸揮塵細論文

又

昨夜中秋今日望十分桂影團圓玉人相對綠尊前素
娥有恨應是妒嬋娟
人靜小庭風露冷歌聲特地清
圓醉紅醺臉髻鬟偏翠裙輕皺端的爲留仙

又

美人象戲

簾幙深深清晝永玉人不耐春閑鏤牙碁子縷金圓象
盤雅戲相對小窗前
隔打直行尖曲路教人費盡機
關局中勝負定誰偏饒伊使幸畢竟我贏先

又
木犀

仙品不同桃李豔移來月窟雲鄉幽姿綽約道家妝綠

聞詞鈔
雲堆髻嬌額半塗黃 可但乍涼風月下饒他獨占秋
光雨中別有惱人香錯教蕭史腸斷憶巫陽

鷓鴣天

題北里選勝圖

脈脈柔情不自持淺鬢輕笑百般宜尊前唱徹黃金縷
一點春愁入翠睂 流薰盼捧瑤卮借君歌扇寫新詩
浮花漫說驚郎目不似東風第一枝

行香子

珠露初零天宇澄明正閑階皎月亭亭更闌人靜烟斂
風清更井邊梧一葉葉做秋聲 斗帳鸞屏翠被華裯
夢回時酒力初醒綠雲堆枕紅玉生春且打疊起龍牙

簾竹夫人

一剪梅

堆枕烏雲墜翠翹午夢驚回滿眼春嬌嬛嬛一搦楚宮
腰那更春來玉減香銷 柳下朱門傍小橋幾度紅窗
誤認鳴鑣斷腸風月可憐宵忍便厭厭兩處無聊

又

高宴華堂夜向闌急管飛霜羯鼓聲乾仙人掌上水晶
盤回按凌波舞袖弓彎 曲罷凝嬌整翠鬟玉筍持盃
巧笑嫣然爲君一笑倒金船只恐醒來人隔雲山

鎮西

同言金
秋風秋雨覺重衾寒透傷心聽曉鐘殘漏凝情久記紅
窗夜雪促膝圍爐交杯勸酒如今頓孤歡偶 念別後
菱花清鏡裏睂峰暗鬪想標容怎禁消瘦忍回首但雲
牋妙墨鴛鴦錦啼妝依然似舊臨風淚沾襟袖

看花回

夜久涼生庭院漏聲頻促念昔勝游舊地對畫閣層巒
雨餘烟簇新詩暗藏小字霜刀刊翠竹攜素手細遶回
塘芰荷香裏彩鴛宿 別後想香銷膩玉帶圍減削寬
金粟雖有鱗鴻錦素奈事與心違佳期難卜擬解愁腸
萬結惟憑尊酒綠望天涯斷魂處醉拍闌干曲

訴衷情

亭亭秋水玉芙蓉天際水浮空碧雲望中空暮人在廣
寒宮 雙鑊枕曲屏風小房櫳可憐今夜明月清風無
計君同

浪淘沙

樓下水潺湲樓外屏山淡烟籠月晚涼天曾與玉人攜
素手同倚闌干 雲散夢難圓幽恨綿綿舊游重到忍
重看負你一生多少淚月下花前

如夢令

人靜重門深亞朱閣畫簾高挂人與月俱圓月色波光

相射瀟灑瀟灑人月長如今夜

又

今夜行雲何處還是月華當午倚遍曲闌橋望斷錦屏
歸路空去空去夢到綠窗朱戶

春光好

傷春晚送春歸步雲溪綠葉同心雙小字記曾題樓
外紅日平西長亭路烟草萋萋雲雨不成新夢後倚闌
時

又

天如水月如鉤正新秋月影參差人窈窕小紅樓如

今往事悠悠樓前水腸斷東流舊物忍看金約腕玉搔
頭

又

一番雨一番涼夜初長滿院蛩聲人不寐月侵廊木
犀微綻幽芳西風透窈窕紅窗恰似箇人鴛被裏玉肌
香

又

鸞屏掩翠衾香小蘭房回首當時雲雨夢兩難忘如
今水遠山長憑鱗翼難敘衷腸況是教人無可恨一味
思量

風流子

韶華驚晚晚春光老倦客惜年芳正庭樾蔭濃半藏鶯
語晚蘭香減時有蜂忙粉牆低嫩嵐滋翠葆零露濕殘
妝風暖晝長柳棉吹盡淡烟微雨梅子初黃 洛浦音
容遠書空漫惆悵往事悲涼無奈錦鱗杳杳不渡橫塘
念胡蝶夢回子規聲裏半窗斜月一枕餘香擬待自寬
除非鐵石心腸

朝中措

章臺楊柳月依依飛絮送春歸院宇日長人靜園林綠
暗紅稀 庭花謝了行雲散後物是人非惟有一襟清

淚凭闌洒遍殘枝

又

雨餘清鏡湛秋容屏展九華峰萬里閑雲散盡半規涼
月當空 樓高夜永憑闌笑語此際誰同端有妙人攜
手翛然歸路凌風

侍香金童

寶馬行春緩轡隨油壁念一瞬韶光堪重惜還是去年
同醉日客裏情懷倍添悽惻 記南城錦筵名園曾遍
歷更柳下人家如織此際憑闌愁脈脈滿目江山暮雲
空碧

西江月

翡翠蒙金衫子辟塵如意冠兒持杯輕按遏雲詞別是
出塵風味 莫羨雙星舊約願諧明月佳期憑肩私語
兩心知一棹五湖烟水

蒼梧謠

天休使圓蟾照客眠人何在桂影自嬋娟

采桑子

孫仲益集西齋題侍兒
作第一流賦此謝之

奇花不比尋常豔獨步南州往事悠悠遼鶴重來憶舊
游 仙翁不改青青眼一醉遲留妙墨銀鈎題作人間
第一流

洞仙歌

鶯鶯燕燕本是于飛伴風月佳時阻幽願但人心堅固
後天也憐人相逢處依舊桃花人面 綠窗攜手乍簾
幙重重燭影搖紅夜將半對尊前如夢欲語魂驚語未
竟已覺衣襟淚滿我只爲相思特地來這度更休推後
回相見

瑞鶴仙

玉貌香漫蕪歎瓶沈簪斷紫簫聲絕丹青挂寒壁細端
詳宛是舊時標格音容望極奈弱水蓬山路隔似瑤林
瓊樹韶華正好一枝先折 悽切相思情味鏡中綠鬢

看成華髮臨風對月空羅袂搵清血待隨羣逐隊開倉
一笑除是心腸鐵石看今生爲伊煩惱甚時是徹

右友古詞

李持正

莆田人字季秉政和五年進士歷知
德慶南劍潮陽三郡終朝請大夫

明月逐人來 上元

星河明澹春來深淺紅蓮正滿城開遍禁街行樂暗塵
香拂面皓月隨人近遠 天半鰲山光動鳳樓兩觀東
風靜珠簾不捲玉輦待歸雲外聞絃管認得宮花影轉

右詞綜

鄧

肅沙縣人字志宏宣和間入太學以詩諷花石
綱斥歸靖康召對授鴻臚簿使金營僞楚立

奔行在高宗擢左正言以屢陳時務
忤執政罷歸旋卒有柝欄集詞附

長相思

一重溪兩重溪溪轉山回路欲迷朱闌出翠微 梅花
飛雪花飛醉臥幽亭不掩扉冷香尋夢歸

生查子

執手兩潸然情極都無語去馬更匆匆一息迷回顧
孤館得邨醪一醉空離緒酒醒卻無人簾外三更雨

南歌子

雲繞風前鬢春開鏡裏妝鳳屏春晝裊龍香淺畫娥眉
新樣遠山長 比翼曾同夢雙魚隔異鄉玉樓依舊暗

垂楊樓下落花流水自斜陽

右詞綜

劉子輦 崇安人字彥冲以父翰蔭補承務郎授興化通判父死金營丐祠不仕自號病翁有屏山

集詞附

滿庭芳 和胡明仲桂花

秋入微陰涼生平遠小山愁絕天南似聞還斷飛策遍
千巖葉底輕黃纂纂惱人是微裂芳緘翛然勝清真冷
淡無豔寄塵凡 澄潭欹兩岸波光搖動碧影相參任
西風十里吹度松杉我自寒灰槁木凝神處不覺醺酣
歸來晚飛花無迹明月滿空山

驀山溪

浮烟冷雨此日還重九秋去又秋來但黃花年年依舊
平臺戲馬無處問南徐茆舍小竹籬疎兀坐空搔首
客來何有草草三杯酒一笑萬緣空休貪他金印如斗
病翁老矣誰其賦歸歟芟隴麥釣溪魚肯落他人後

右花庵詞選

高登 漳浦人字彥先靖康在太學以屢上書斥歸紹興二年廷對以直言附第五甲授富川簿

忤秦檜編管容州有東溪集

好事近 黃義卿畫竹

瀟灑帶霜枝獨向歲寒時節觸目千林憔悴更幽姿清

絕 多才應賦得天真落筆驚風葉從此綠窗深處有

一稍涼月

又

送客過江邨况值重陽佳節向晚西風蕭瑟正離人愁

絕 尊前相顧惜參商引十分蕉葉回首高陽人散負

西樓風月

又

飲興正闌珊恰是揮毫時節霜幹銀鉤錦句有壁間三

絕 西風特地颯秋聲樓外觸殘葉匹馬翩然歸去向

征鞍敲月

右 御選歷代詩餘

康與之

福寧人初名執權字伯可南渡後以樂府受知高宗凡朝廟樂章兩宮宴集成假其歌咏故應制之作爲多官至侍郎有順庵樂府

寶鼎現

夕陽西下暮靄紅溢香風羅綺乘麗景華燈爭放濃燄

燒空連錦砌靚皓月浸巖城如晝花影寒籠絳蕊漸掩

映芙蓉萬頃迤邐齊開秋水 太守無限行歌意擁麾

幢光動珠翠傾萬井歌臺舞榭瞻望朱輪駢鼓吹控寶

馬耀貔貅千騎銀燭交光數里似亂簇寒星萬點擁入

蓬壺影裏 來伴宴閣多才環豔粉瑤簪珠履恐看看

丹詔催奉宸游宴侍便趁早占通宵醉莫放笙歌起任
畫角吹徹寒梅月落西樓十二

右樂府雅詞拾遺

瑞鶴仙 上元應制

瑞烟浮禁苑正絳闕春回新正方半冰輪桂華滿溢花
衢歌市芙蓉開遍龍樓兩觀見銀燭星毬有爛捲珠簾
盡日笙歌盛集寶釵金釧 堪羨綺羅叢裏蘭麝香中
正宜游玩風柔夜暖笑聲喧花影亂鬧蛾兒滿路成團
打塊簇著冠兒鬪轉喜皇都舊日風光太平再見

又 別恨

薄寒羅袖怯教小玉添香被翻宮纈蘭缸半明滅聽幾
聲歸雁一簾微月情波恨葉索新詞猶自怨別夢回時
雪暖酥凝掠鬢寶鴛釵折 悽切紋窗描繡舊譜尋棋
變成虛設同心對結重來是甚時節悵姑蘇臺上征帆
何許隱隱遙山萬疊袖紅綃獨立無言偷彈淚血

漢宮春

慈寧殿元夕應制

雲海沈沈峭寒收建章雪殘鳩鵲華燈照夜萬井禁城
行樂春隨鬢影參差映柳絲梅萼丹禁杏鰲峰對聳三
山上通寥廓 春衫繡羅香薄步金蓮影下三千綽約
冰輪桂滿皓色冷侵樓閣霓裳帝樂奏昇平天風吹落

留鳳輦通宵宴賞莫放漏聲閒卻

喜遷鶯

臘殘春早正簾幙護寒樓臺清曉寶運當千佳辰餘五
嵩岳誕生元老帝遣阜安宗社人仰雍容廊廟盡總道
是文章燕許勳庸周召 師表方眷遇魚水君臣須信
從來少玉帶金魚朱顏綠髻占斷世間榮耀篆刻鼎彝
將遍整頓乾坤都了願歲歲見柳稍青淺梅英紅小

又

秋寒初勁看雲路雁來碧天如鏡湘浦烟深衡陽沙遠
風外幾行斜陣回首塞門何處故國關河重省漢使老

認上林欲下裴裒清影 江南烟水暝聲過小樓燭暗

金猊冷送目鳴琴裁詩挑錦此恨此情無盡夢想洞庭

飛下散入雲濤千頃過盡也奈杜陵人遠玉關無信

采桑子

促養直赴雪夜溪堂之約

馮夷剪碎澄溪練飛下同雲著地無痕柳絮梅花處處
春 山陰此夜明如晝月滿前邨莫掩溪門恐有扁舟
乘興人

又

自嶺表還臨安作

紅樓紫陌青春路柳色皇州月澹烟柔裊裊亭亭不自
由 舊時扶上雕鞍處此地重游總是新愁柳自輕盈

水自流

訴衷情

登鬱孤臺同施德初讀東坡詩作

鬱孤臺上立多時
烟晚暮雲低
山川城郭良是回首昔
人非
今古事祇堪悲
此心知一尊芳酒慷慨悲歌月
墮人歸

又 長安懷古

阿房廢址漢荒坵
狐兔又羣游
豪華盡成春夢留下古
今愁
君莫上古原頭
淚難收
夕陽西下塞雁南飛
渭水東流

菩薩蠻 長安懷古

秦時宮殿咸陽裏
千門萬戶連雲起
復道亘西東
不禁三月風
漢唐乘王氣
萬歲千秋計
畢竟是荒邱
荆榛滿地愁

又 金陵懷古

龍蟠虎踞金陵郡
古來六代豪華盛
縹鳳不來游
臺空江自流
下臨全楚地
包舉中原勢
可惜草連天
晴郊狐兔眠

感皇恩 幽居

一雨一番涼
江南秋興
門掩蒼苔鎖
寒暹紅塵不到
盡日鳥啼人靜
綠荷風已過
搖香柄
澹陰未解
園林清

屋詞金
潤一片飛花墮紅影殘書讀盡袖手高吟清咏任從車
馬客勞方寸

洞仙歌 荷花

若耶溪路別岸花無數欲斂嬌紅向人語與綠荷相倚
恨回首西風波淼淼三十六陂烟雨 新妝明照水汀
渚生香不嫁東風被誰誤遣踟躕騷客意千里綿綿仙
浪遠何處凌波微步想南浦潮生畫橈歸正月曉風清
斷腸凝竚

浪淘沙

蹙損遠山眉幽怨誰知羅衾滴盡淚燕支夜過春寒愁

未起門外鴉啼 悵悵阻佳期人在天涯東風頻動小
桃枝正是銷魂時候也撩亂花飛

又

愁撚斷釵金遠信沈沈秦箏調怨不成音郎馬不知何
處也樓外春深 好夢已難尋夜夜餘衾目窮千里正
傷心記得當年郎去路綠樹陰陰

江城子 越臺春游作

南溪二月雨初晴四郊明暖風輕一雨一風鋪地落紅
英枝上流鶯啼勸我春欲去且留春 登臨行樂慰閑
情過長亭暮潮平四面青蕪中是越王城信馬行吟歸

陸詩鈔
路晚山簇簇柳陰陰

風入松

一宵風雨送春歸綠暗紅稀畫樓鎮日無人到與誰同
撚花枝門外薔薇開也枝頭梅子酸時 玉人應是數
歸期翠斂愁眉塞鴻不到雙魚遠歎樓前流水難西新
恨欲題紅葉東風滿院花飛

又

碧苔滿地襯殘紅綠樹陰濃曉鶯啼破眉心事舊愁新
恨重重翠黛不忺重掃佳時每恨難同 花開花謝在
東風此恨無窮夢魂擬逐楊花去殢人休下簾櫳要見

只憑清夢幾時真箇相逢

謁金門

春又晚風勁落紅如剪睡起繡牀飛絮滿日長門半掩
不管離腸欲斷聽話梁間雙燕試上小樓還不見樓
前芳草遠

長相思

南高峰北高峰一片湖光烟靄中春來愁煞儂 郎意
濃妾意濃油壁車輕郎馬驄相逢九里松

應天長

管絃繡陌燈火畫橋塵香舊時歸路腸斷蕭娘舊日風

簾映朱戶鶯能舞花解語念後約頓成輕負緩雕轡獨
自歸來凭闌情緒 楚岫在何處香夢悠悠花月更誰
主韶悵後期空有鱗鴻寄紉素枕前淚窗外雨翠幙冷
夜涼虛度未應信此度相思寸腸千縷

玉樓春

青牋後約無憑據誤我碧桃花下語誰將消息問劉郎
悵望玉溪溪上路 春來無限傷情緒擬欲題紅都寄
與東風吹落一庭花手把新愁無寫處

憶秦娥

春寂寞長安古道東風惡東風惡燕支滿地杏花零落

臂消不耐黃金約天寒尚怯春衫薄春衫薄不禁搵
淚爲君彈卻

右花庵詞選

風入松

畫橋流水欲平闌雨後青山去年芳草今年恨恨香車
不逐雕鞍紅杏牆頭院落綠楊樓外秋千 謝娘別後
憶前歡淚滿春衫柔荑共折香紅處勸東風且與流連
早是相思瘦損梅花謝了春寒

憶少年

元夕應制

雙龍燭影千門夜色三五晏瑤臺舞蝶隨香飛蟬撲髻

人自蘂宮來 太平簫鼓宸居曉清漏玉壺催步輦歸
時綺羅生潤花上月徘徊

風流子

謫居嶺南聞歌賀方回詞和作

結客少年場繁華夢舊日賞風光紅燈九街買移花市
畫樓十里特地梅妝醉魂蕩龍跳擣萬字鯨飲吸三江
驕隨鈿車玉驄南陌喜搖雙槳紅袖橫塘 天涯歸期
阻衡陽雁不到路隔三湘難見謝娘詩好蘇小歌長漫
自惜鸞膠朱絃何在暗藏羅結紅綬消香歌罷淚沾宮
錦襟袖淋浪

杏花天

慈寧殿春晚出游應制

帝城柳色藏春絮嫩綠滿游人歸路殘紅賸蕊留春住
無奈霏微細雨 南陌上玉轡鈿車悵紫陌青門日暮
黃昏院落人歸去猶有流鶯對語 換頭句車字用平叶

卜算子

潮生浦口雲潮落津頭樹潮本無心落又生人自來還
去 今古短長亭送往迎來處老盡東西南北人亭下
潮如故

右陽春白雪

減字木蘭花

楊花飄盡雲壓綠陰鴉乍定簾幙閑垂弄語千般燕子

聞言錄
飛 小樓深靜睡起殘妝猶未整夢不成歸清淚滴斑
金縷衣

采桑子

晚來一霎風兼雨洗盡炎光理罷絲簧卻對菱花淡淡
妝 絳綃縷薄冰肌瑩雪膩酥香笑語檀郎今夜紗廚
枕簟涼

荷葉鋪水面

春光豔冶游人踏綠苔千紅萬紫競香開暖風拂鼻籟
驀地暗香透滿懷 茶蘼似錦裁嬌紅間嫩白只怕迅
速春回誤落在塵埃折向鬢雲邊金鳳釵

